

鬱

岡

齋

筆

塵

懺齋筆麈第四冊

金壇王肯堂字泰甫

萬曆癸卯十二月九日陰雲凝沍薄晚雷聲隱隱隆隆亦有電光明日雪

僧有破戒噉酒肉近婦女而口談大乘者舍弟稱其聰明不覆藏余曰此謂無慙愧非不覆藏也彼破戒而畏人知者猶有慙愧也慙愧卽佛種無慙愧卽三塗種豈可以不辨

楊慈湖謂真西山曰希元有志聖賢之學而不

能忘情富貴利達何也西山不服慈湖曰嘗見以命問日者故知之每見今之講學者好談命看風水其真情固已和盤托出而猶自謂步趨孔孟恬於勢利豈必慈湖然後覷破哉朱文公先生亦談風水亦是通人之一蔽國初曾狀元蔡道經舉場見舉子三場畢占課者笑曰此秀才必不濟有人爲考官閱卷庸庸者多而解額有限難於去取因思舉子在外如何不去占卜故凡昧昧前途而聽於卜

筮者皆自信不過者也豈獨舉子乎然則古
聖人大事必卜非耶曰所謂汝則從卿士從
庶民從者未嘗不先定也特命之龜筮以見
天人合爾故余謂易爲不知易者作不爲知
易者作

古語云虛願不至然有不願而至者矣奔競不
願黜而黜至賭博不願貧而貧至召庸醫治
病不願死而死至醉飽房勞不願病而病至
則不願乃實願也又何惑乎虛願之不至也

撫言云元相公在浙東時賓府有薛書記飲酒
醉後因爭令擲注子擊傷相公猶子遂出幕
醒來乃作十離詩爲獻其爲幕賓明矣而宣
城梅禹金輯青泥蓮華記遂以爲薛濤盖因
濤有校書之號故傳之然書記非校書也雲
溪友議云相國廉問浙東別濤已逾十載方
擬馳使往蜀取濤乃有劉採春自淮甸來篇
詠雖不及濤容華莫之比也元公似忘薛濤
而贈採春云云觀此則洪度之跡不至浙幕

明矣鑒戒錄所述薛濤獻連帥五難詩其辭
言似是一事而男女自分禹金合之亦博洽
者千慮之一失也

廣陵邵伯湖中有小洲上建露筋烈女廟俗傳
有姑嫂它適至此而暮蟲勢甚盛時有數男
子張幃宿其中嫂不能忍亦就之宿姑獨露
坐飼蟲至于筋見而殞詞客過者或詠歌之
不知其誤按江德藻聘北道記云自邵伯埭
三十六里至鹿筋梁先有邏此處足白鳥故

老云有鹿過此一夕爲蚊所齧至曉見筋因
以爲名北音謂鹿爲露故訛爲露爾酉陽雜
俎云江淮間有驛俗呼露筋嘗有人醉止其
處一夕白鳥蛄噉血滴筋露而死始則訛鹿
爲人旣又訛男爲女世事往往皆然雜俎續
集世旣罕行卒莫爲是正故特表而出之以
俟後之志方輿者

王彥輔塵史以所見杜牧之書村舍門扉墨迹
隱然突起爲可怪又建安吉祥寺柱有蔡君

謨題字亦然疑松煤所漬非也嘗記一書言
栴木上書字皆突起第未之試爾吾邑慈雲
寺三門有碑蘆席迹隱然深數分俗傳有仙
人宿於此是其遺跡不知霜天露地以蘆席
覆石皆有痕正不足爲異也

揮麈三錄載趙叔近以秀州守免官居於郡代
之者殘酷軍民囚之而迎叔近復領州事先
是王淵爲小官時狎露臺娼周者稔甚亂後
爲叔近所得淵每對人切齒至是張韓皆爲

部曲乃命張提師以往張素父事淵默解其
旨乃斬叔近而獲周娼歸以獻於淵淵勞之
曰處置甚當但此婦人吾豈宜納君自取之
張云父既不取某焉敢耶時韓在旁淵顧曰
汝留之無嫌也韓再拜而受之旣歸韓甚見
寵嬖爲韓生子韓旣貴盛周遂享國封之榮
按鶴林玉露載韓斬王夫人梁氏爲京口娼
至見於正史今又以爲周何耶若並有之則
周不應膺國封也豈斬王功盛封及妾媵耶

王明清與韓同世又在羅大經之前其可傳
信無疑者世人知梁而不知周故著之

孟子知好色則慕少艾趙岐注艾美好也乃隨
文鑿解非古訓也按曲禮五十曰艾方言東
齊魯衛之間凡尊老謂之倭或謂之艾爾雅
艾歷也郭璞曰長者多經歷也蓋淫夫之情
有好老者故並舉二種以蔽之程大昌攷古
編以爲衰減之意是亦知美好爲非是而思
易之然血氣方壯慾火日熾安有所謂衰減

者哉

仇池筆記云徐倅李陶有子年十七八忽詠落
花詩云流水難窮目斜陽易斷腸誰同研光
帽一曲舞山香父驚問之若有物憑附之者
云西王母宴群仙有舞者戴研光帽上簪花
舞山香一曲未終花皆落去按羯鼓錄云汝
陽王璿寧王長子常帶研絹帽子打曲上自
摘紅槿花置帽上簷處二物極滑久之方安
遂奏舞山香一曲而花不墜前詩所用蓋本

此而以爲群仙者謬也意此子勦舊詩以爲已作而誤記其出處以欺其父乃并以欺坡仙而記之且簪花而舞正以不落爲奇今乃誤云皆落去可發一笑

世俗謂僧道有妻者爲火居乃火宅之譌蓋以在俗爲火宅而出家爲出火宅又爲火宅蓮華若有室則復入火宅矣

蘇魏公談訓云韓子華出守禁從館閣皆祖餞焉坐有言芸閣何出而坐間諸鉅公皆不記

祖父曰事見初學記蓋諸公忽而不讀爾今
檢初學記無之按魚豢典略云芸草辟紙蠹
故藏書閣曰芸閣陳子昂集云祖歛仁檢校
秘書郎持三筆終入芸香之閣是也

翰林於朝班中序齒不序官此舊制也後以
有新科而年長者一旦據前輩上於心不安
遂更爲序科科同則序齒至五品則不然故
戲謂之五品不遜至於初授官而其人已拜
學士者卽不拜學士而先登甲第七科者授

刺皆稱晚生官之崇卑無論也詞林典故修
於近年猶明載此事辛卯冬澱水趙公由吏
部左侍郎大拜癸未翰林諸公與之相去五
科乃改稱晚侍生余甚訝之後見王弇州先
生觚不觚錄云余入朝見分宜首揆而華亭
次之其登第相去六科分宜又不爲學士華
亭爲首揆而常熟嚴公次之科第相去亦六
科華亭又不爲學士授刺俱稱晚生已小變
矣至江陵首揆而蒲坂次之相去僅二科而

亦稱晚生何也則局體之變有自來矣不當稱而稱之必有當稱而不稱者冰炭交懷雅道漸滅吾不知其所極也

何元朗四友齋叢說言南京五城兵馬之納財舞勢蓋因有一二道長欲入苞苴有事發五城兵馬勘處兵馬遂爲之鷹犬卽爲其所持而莫敢誰何之故恣肆無忌若此此嘉靖間事也近則不至是矣然聞癸卯冬以妖書獄興奉 旨令廠衛城捕緝捕奸人廠衛不聞

有所擾而巡捕武弁與五城兵馬之勢張甚
事罷官與役皆富不貲然終得奸人者厥衛
也而城捕又與之同受賞焉後雖以考功法
罷之猶不失爲富翁也何以儆將來乎

皇城東安門外稍北有禮儀房乃選養奶口以
候 內廷宣召之所俗名奶子府隸錦衣衛
有提督司禮監太監有掌房有貼房俱錦衣
衛指揮每歲每季精選奶口四十名養之於
內謂之坐季奶口別選八十名籍於官謂之

點卯奶口倘坐季者有故卽以補之而取盈
焉季終則更之先期宛平大興兩縣及各衙
門博求軍民家有夫女口年十五以上二十
以下夫男俱全形容端正第三胎生男女僅
三月者雜選之仍令穩婆驗無隱疾具結起
送候司禮監請 旨特差內秉筆者一人出
合各衙門所送奶口會選乃定每口日給米
八合肉四兩光祿寺支領每年更番什物每
季煤炭雜器兩縣召商辦送每遇 內廷不

時宣取則就中選一人易高髻新衣官妝以
進卽不當至十餘易不止也

故事民間婦無得入 禁中者卽諸宮女已承
恩賜名稱其母非得 旨亦不入惟三婆則
時有之一曰奶婆卽兩縣及各衙門選送禮
儀房坐季奶曰若 內廷將有誕喜則預召
數人候之內直房產男用乳女者產女用乳
男者初亦雜試候月餘乃留一人一日醫婆
取精通方脉者候 內有 旨則各衙門選

取以送司禮監會選中籍名待 詔入選者
婦女多榮之一曰穩婆卽民間收生婆中預
選籍名在官者惟 內府所用之如選宮女
則用以辨別妍媸可否如選奶口則用以等
第乳汁厚薄隱疾有無如 內廷有喜則先
期預集老於事者直宿日夕候之事定乃罷
諸婆中有一經傳宣者則出入高髻彩衣如
宮妝以自別於曹偶民間亦以此信而用之
醫婆穩婆事竣皆得出惟奶口一留用則終

其身事所乳得霑恩澤無復出理其食報盖
特隆云

京城西阜城門外五里許有靜樂堂磚甃二井
屋以塔南通方尺門謹閉之井前結石爲洞
四方通風卽宮女火葬之所也 北安門外
有屋數楹名安樂堂 令甲 官人有故非
有名稱者例不 賜墓則出之 禁城後舜
貞門傍右門承以歛具昇出 玄武門經北
上門北中門達安樂堂授其守者召本堂土

工移北堂門外停屍房易以朱棺禮送之靜
樂望火葬塔井中凡 宮人故必請 旨凡
出必以銅符合符乃遣凡堂房皆掌之中貴
人凡授受皆以籍其官人出父兄或在者從
棺所送之堂外面止不禁也而亦不得入嘉
靖末有 貴嬪某捐貲易民地數畝圍之堂
內其後焚燼不願井者悉內地中今亦隆然
高起矣

世說所載多非事實如石崇火浣衫珊瑚樹事

定皆無之此君亦當時俊傑若憊不曉事如此血汚西京市久矣豈待趙王倫哉至於豆粥韭萍虀乃三家邨乞兒所爲鋪張豪侈遂至及此殺風景極矣

老學菴筆記云昭德諸晁謂壻爲借倩之倩云近世方訛爲倩盼之倩予幼小不能叩所出至今悔之按方言東齊之間壻謂之倩郭璞曰言可假借也放翁偶未之考耳然一疑失問至老悔之而筆之書此吾儕所愧也

陳眉公秘笈有云陳希夷聚諸少年將入潤州
爲變聞藝祖登極而止夫不知天命之有歸
則雖百藝祖登極何關人事何遽中止旣知
天命之有歸而又何變之圖也大笑至墜驢
曰天下自此定矣此其踴躍與唐明宗願天
早生聖人意豈異哉夫腐鼠不可以嚇鷄雛
高士豈辦作賊設如眉公言則希夷亦近日
李王龍鳳之流爾

眉公見聞錄有云羅念菴拜唐荆川荆川他出

荆川之翁出接念菴坐久之唐翁云小兒有一病老先生宜與他說交際人之常禮也小兒一切不受亦不是念菴對云此病在它人不可無在令郎不可有吾幼時嘗於先公案頭見念菴先生冬遊記具載此語蓋二公皆以宮僚內召相約同赴闕迨念菴至而荆川已先行時已歲暮念菴恐阻水故駐家廣陵而獨身之金陵晤王龍溪諸公相與論學時唐有懷翁爲南曹郎念菴謁之翁言及

荆川有固執不近人情處念菴曰在它人不可無在令郎不可有然令郎儘精進久之亦自消融矣雖記得彷彿然大意如此若曰交際一切不受則吾見亦多矣形迹可以矯飾卽貪廉邪正互有之又何必以有無爲校耶如此記載所謂道聽塗說者也

非父而與父同其尊者舅也非母而與母同其尊者姑也故女子謂夫之父母爲舅姑男子亦謂妻之父母爲外舅外姑今世俗婦隨夫

而以父母呼舅姑已是二本乃至脊亦隨婦
而以父母呼外舅姑不已甚乎每見士大夫
亦有稱妻父母爲外父外母者不學之過也
甲辰春錫山錢大夫景醇故知也過余而言及
報應因舉所聞見曰向同知開封府時謁監
司王公明時以鄉曲留款中席而歎曰人命
至重居官不可不慎也錢起而請其說曰吾
有警焉吾鄉有喬憲僉者姻也治兵蜀中與
大將劉顯等奉 旨進兵攻九絲城克之數

萬衆殲焉又數年免歸一日爲宴于家延賓而吾預焉喬居主席有稚而坐於側者其從孫也忽愕而起曰席之下有蹲焉者蓬首黎面耳貫環是爲何人也坐客驚顧左右尋視無有也笑以爲妄而主人面色如土默不言蓋若有見焉無何客稍稍引去主人亦不留吾甚訝之詰旦遣力謝主人則已死矣夫奉旨誅叛逆玉石俱焚勢所不免且有太將在也使者雖名治兵徒持文墨論議耳猶得報

若是而況身殺之者乎君其識之以告諸居
官者慎之哉余曰王公長者也吾嘗識之京
師斯亦仁人之言也錢大夫又曰吾邑有尤
生者故解元瑛之從子也爲諸生有盛名太
守穆公延之郡齋教其諸子晉陵之民有爲
盜者爲其仇訐諸郡盜懼而介尤之外兄戈
生請尤生爲解釋尤生許之因爲穆公言穆
公信之因反坐訐者鉗鉞錫山郵舍竟瘐死
一日尤生之義興就督學使者試閒行市中

忽見其人從前來爲尤生舉手交臂而過尤生固已心動然無他也秋闈旣迫至白下入貢院趨號舍則有人焉警而起之又其人也乃大恐稱疾以出歸錫山遂卧病日以沉困尤生素謹事關將軍一日恍忽見關將軍坐其牀拊循之生因哀籲求救將軍曰此怨對索命吾力不能禁以汝事吾謹特一視汝耳生叩首曰此外兄戈生誤我我不知果真盜也將軍曰戈生一細民爾能動太守者誰乎

而尚誰諉哉將軍遂去尤生爲家人言之無
何竟死

吳中一富家子忽思一日而盡千金計諸人莫
能就或教之曰以千金盡買金箔擇大風之
日適廣漠之野於上風解而縱之使幡纚旖
旎於空中成金色世界於公何如大喜如其
言頃刻而盡夫鄉市不乏貧者衣食其饑寒
樁死者藥病者或齋僧道或買放生生命皆可
一日盡千金也而莫有爲之計者何哉雖然

卽有爲之計者彼亦不從也故富人多不肯爲善作福非不肯也天不許也哀哉

千金養性篇云左右供使之人得清淨子弟小心少過謙謹者自然事閒無物相惱令人氣和心平凡人不能絕瞋若用無禮之人易生瞋怒妨人導性此言若爲余設也余性卞而數奇無便僻使令分觸事易怒多由於此然常思之能安命則不怒能恕物矜愚則不怒能了心外無法則不怒而不能不怒者正坐

放逸故耳每思覓稍謹慧者以供指使念雖可省瞋適以養瞋輒復中止昔有問大熱向何處避者荅曰向鑊湯裏避何以故曰衆苦所不到此言可以深長思也

東坡頽濱相遇梧藤間就道傍市湯餅脩惡不可食子由置箸而歎東坡已盡之矣顧子由曰尚欲咀嚼耶秦少游聞之曰此先生飲酒但飲濕法也內典有四食以變壞時爲段食以受用時爲觸食段食止許充虛養身而已

至于分別好惡取適口者而進之乃觸食事
坡仙但順段食不順觸食故云飲酒但飲濕
也

世所行傳奇但知馮京之父以還妾陰德生子
狀元宰相而不知父之的名遂以爲名商而
爲商此寡陋之過也京父名式爲左侍禁以
終京幼時取其所讀書題其後曰將仕郎守
將作監丞通判荆南軍府事借緋馮京式旣
沒十一年京始及第爲荆南通判視其父所

題無一字差者然則京父亦異人也

南唐保大中浚秦淮得石志案其刻有大宋乾德四年凡六字他皆磨滅不可識今諸儒參驗乃輔公祐反江東明年號後趙太祖受命國號宋改元乾德江左始衰弱豈非威靈將及而符讖先著也今人知王衍而不知輔公祐知宮人之鏡而不知秦淮之石故著之雲南景東府境內有蛇大僅如守宮常緣樹而棲見人輒墮地則碎爲數段人去復續以爲

藥可以已大風癰瘍遠過白花烏虵之屬人挾筒而往見而掇之以入筒一經人手則不復能續而死矣然亦難值其價與金等名曰脆蛇亦曰碎蛇

西域有撒法藍狀如紅藍花藝之芬馥清潤至中國價與黃金等卽所謂鬱金香也陳藏器云鬱金香生大秦國二月三月有花狀如紅藍四月五月采花卽香也南州異物志云鬱金香出罽賓國人種之先以供佛數日萎然

後取之色正黃與芙蓉花裏嫩蓮者相似可
以香酒唐書云太宗時伽毘國獻鬱金香葉
似麥門冬九月花開狀似芙蓉其色紫碧香
聞數十步花而不實欲種者取根此言花色
不同或不一種今撒法藍乃作紅黃色與前
書異矣此中人謂之番紅花不知紅花元自
張騫得之於西域安得又有番紅花耶今之
所謂鬱金者惟蜀中有之佳者亦自難得今
人惟取薑黃代之真鬱香雖亦辛香而氣不

馥烈古之釀酒以降神者此耶彼耶或四夷
來賓重譯而至者遂爲宗廟用耶或古有之
而今無耶皆不可知也

今梵侶持戒不殺者於身蟲輒授之地余謂非
爲人踐踏則復着人爾烏在其爲不殺也後
閱鷄肋篇載汝陰尉李仲舒平生戒殺常依
釋教置蝨於縣絮骨筒中久亦飢死有人教
置青草葉上經宿沾露則化爲青蟲飛去試
之信然皆背析而化宜刻之以傳修梵行者

劉貽哲謫海南市舶提舉云有持犀杯求
售者斟酒晝則日夜則月見於酒中酒盡卽
隱又有珠自然作師子形纖悉畢具

端州硯石中唐以後已漸知名柳公權云端溪
石爲硯至妙許渾歲暮自廣江至新興詩云
洞丁多斲石蠻女半淘金自注云端州斲石
李賀歌云端州匠者巧如神則此時採者已
極盛矣蔡絛云太上留心文雅在大觀中命
廣東漕臣督採端溪石硯上焉時未嘗動經

費乃括二廣頭子錢千萬日役五十夫久之
得九千枚皆珍材也時以三千枚進御二千
分賜大臣侍從而諸王內侍咸願得之詔更
上千枚餘三千枚藏諸大觀庫於是俾有司
封禁端溪之下巖穴蓋欲後世獨貴是硯按
下巖石在深溪中所謂千夫挽綆百運斤豈
虛語哉彼五十夫豈能辦又安得如許珍材
蓋徽宗非精人只誇多爾而條之言亦未足
信也

爛柯山在高要縣東三十六里峰頂常有紫霞
蓋寶石之氣也石之佳者紫氣鮮潤如黥脂
中有青紋謂之音縹其文如雲霞如錦綺李
長吉集中所謂青花紫石硯者長吉詩云踏
天磨刀割紫雲傭剗抱水含滿唇暗灑長弘
冷血痕劉禹錫詩云玉蜍吐水霞光淨綵翰
搖風絳錦鮮非目睹斯石則不知是詩狀物
之工也

硯譜云下嵒北壁石背爲泉水所浸瀰漫湧溢

下流爲溪崑之中歲久崩摧石屑翳塞積水
屈曲淺深莫測以是石工不復能採矣今世
所有下崑硯唐五季國初時物也觀此則今
世所傳宋貢硯非下崑石彰彰矣至我明
萬曆二十七年採珠內史奉 詔開採使蛋
人泅而取之則塊生其中有黃臙如玉璞然
鑿去始見硯材然百不得一焉於是下崑石
始復出世

歐陽永叔云端石以子石爲上在大石中生蓋

精石也而米元章非之謂嘗徧詢石工云子
石未嘗有其在巖中實於大石版上鑿豈有
中包一子者余意其說必確今乃知下嵒石
品貴重隣於寶玉皆有龜臙裹之如子之在
胞胎故名之曰子石爾米氏又云下嵒旣深
工人所費多硯直不補故力無能取近年無
復有聞則所詢石工所見乃半邊山嵒及蚌
坑石耳豈復知有下嵒子石者哉

端石堅潤如玉而著墨如泥蓋天生硯材也宋

時下品石既不可得而蚌坑等皆山中常石故宋高宗翰墨志與蘇東坡米元章范石湖輩皆謂端石不發墨而以歛之龍尾方城之葛仙公巖石温州之華嚴寺巖石品出其上豈定論哉新款硯絕無佳者而宋硯光滑拒墨特甚蓋用久則鋒鋌頓盡遂成棄物方城温州石今絕不聞可硯者惟下品端石萬古如新今日所得直追中唐遠出宋硯之上何啻千百倍亦一時之盛也

聞之自嶺南來者云彼中良硯材多石璞解去
麤臃乃得之有至心只是麤石不可硯者其
如霞如錦如水波紋等千百中之一二爾米
氏硯史乃謂平生約見五七百枚十千已上
無估則謂元章目不識端硯可也

宋時品端硯以有眼爲貴有死眼活眼之別至
以眼之多寡爲價之重輕今所開下品石絕
無眼而有眼者乃出新坑圓暈重重中有瞳
神或布列硯中如北斗心房之形者然皆下

材也此宋之所貴者耶歐陽永叔云眼石病也官司歲以爲貢在他硯上然十無一二發墨者但充翫好而已非虛語也

古物之所以貴者以今人盡技爲之不能彷彿其什一如古銅彝鼎官窰哥窰器物之類是也若硯石則生於山中久矣特取有先後而石無今古但當論其材之美惡不當論其硯之新舊自昔之譜硯者皆然今俗子聞是古硯則寶重之聞是新石則不顧至使射利之

徒取頑石草草斲之剗剗殘缺取舊銘刻其
陰束草熏之使其色變然後曝之烈日中渴
燥之極飲以墨漿積以歲月洗滌不去售之
輒得重價閩人蘇人業硯者藉此溫飽此乃
小兒強作解事者目前紛紛皆是何足道哉
發墨與下墨不同下墨謂磨之墨易下也石理
麤有鉉者皆能之然不惟損筆亦能晦墨蓋
石質麤燥故也發墨者研磨良久金光燁然
如漆如油而著墨如泥無聲蓋發墨者未有

不下墨者石中有火石滑磨久墨下遲則兩
剛生熱故膠生泡墨光豈得發哉歐陽永叔
誤以下墨爲發墨至謂瓦硯爲第一可發一
笑也

青州青石硯柳公權以爲第一盖此時端石未
著故也唐子西家藏古硯銘曰不能銳因以
鈍爲體不能動因以靜爲用惟其然是以能
永年其硯今在于潤甫處乃青州石色青如
靛著墨如泥而不甚發質理亦不堅潤堪與

端石作奴爾

今之俗子於硯則重古於墨則重香甚至曝於
烈日使渴甚以受墨瀋而爲僞鏤雜入珠寶
以爲珍雖有良材蔑不敗矣宋寇昌齡嗜硯
墨得名晚居徐守問之曰墨貴黑硯貴發墨
守不解以爲輕已嗚呼天下之至異不出于
至常非篤好深造未易知也豈獨硯與墨哉
端溪石堅潤如玉至于剗鑿不入而著墨如泥
不經日洗滌輒不可去蓋其性與墨相入故

是天生硯材自古重之有以也宋人作硯譜錄乃謂龍尾遠出端溪上其最可尚者每用墨訖以水滌之泮然盡去不復留蹟於其間其過於端溪以此誤矣今宋硯之爲龍尾者滑而拒墨不復爲世所貴而惟端溪萬古常新豈可同日論哉

端溪出一種白石黑章作山水屈曲之文土人琢以爲屏亦可作硯爲研朱之用

古硯黑漬處洗滌不可去謂之墨鏽購古研者

必以此辨之此三家村小兒強作解事者之
見耳余在京師時數見古研有鏽者絕少有
若初未受墨者蓋古人謂研不可一日不滌
初未嘗使點墨停留安得有鏽今市賈欲以
新爲舊故煇草熏之磨墨漬之以變其色而
或有病古硯之無鏽亦如前法修治者真燒
琴煮鶴手也

鑒硯無奇法石理細潤者必不受墨其麤燥者
墨易下而損筆亦損墨色皆非硯材若細潤

如玉而著墨如有鉞不數研已濃則天生硯材也然石中如此者絕少故端溪下巖歙之龍尾皆爲世所貴重鑒賞之家不惜重貲購之大抵石之細潤而拒墨者必磨久久則兩剛生熱而膠泛煙浮石之麤燥者性必不堅往往石與墨相雜故兩者皆損墨色若細潤而下墨則自然發墨此理不難見也而知之者鮮矣

研之發墨者又以用久不退乏爲貴龍尾硯在

宋人稱其發墨在端溪下嵒之上而今研磨幾如鏡面盖用久退乏故也

有宋盛時端溪下嵒石翳泉深取之者得不償失故不復采而中嵒舊坑亦竭士大夫所用研石往往皆上巖新坑產耳故歐蔡蘇米輩皆有拒墨之歎至下其品謂不及歛之龍尾方城之葛仙公巖石今世好古之家所蓄古端硯悉此品也以墨試之滑如鏡面不復可用徒以耳鑒目玩而已余嘗謂作書使鈍硯

如娶妻得石女將安用之

洞天清祿集謂唐時所取端溪石無紫者然蘇長公所蓄許敬宗硯實端溪紫石也此在初唐已有之況中晚乎今世所有古端硯雖光如鏡面而以墨試之索索而下覺有鋸用久不乏者多唐末宋初物也蓋盛宋時下品穴閉絕無此種

唐紫端硯多無眼宋硯乃有眼眼之在石猶木之有節也其膏潤發墨乃由于此故以眼之

多寡爲價之重輕若舊坑石初不藉眼爲重而或者謂惟舊坑石多眼或謂眼爲石病皆非也

黃山谷先生就書閣間取小錦囊中有墨半丸以示潘谷谷隔囊捫之卽置几上頓首曰天下之寶也出之乃李廷珪之作者又取小錦囊亦有墨一丸谷捫之如前則嘆曰今老矣不能爲也出之乃谷少時作者嗚呼古人一藝之精至于六根互用如此此其心可知口

不可得言而世之人方較量濃淡之間以爲知音不亦謬乎故曰不知者如鳥之雌雄其知之者如烏鵲也

造朱挺子法用辰州朱砂有神氣者乳鉢內輕輕研細淨水飛澄陰乾上好入漆截角心紅用廣膠熬水浸之以手搓洗飛澄去黃臙候水清爲度却以淨水再飛澄煎去濁脚紫黑色者不用獨取澄淨鮮紅者再用烏梅湯搓洗二三次隔紙曬乾每砂六兩配心紅十兩

於染肆中取成造紅花汁以新汲水浸之澄
去浮面清水取盃底濃汁約盃許作三四次
拌朱令濕攤於磁盃內不許見日唯取日色
逼乾亦忌見火若犯日與火則通身盡變爲
黃矣乾後乃用上好透明真廣膠一兩二錢
八分清化半盞頓化候冷和朱搓合成劑一
方加珊瑚末一兩冰片三錢二分妙

製朱砂法朱砂如箭鏃如蕎麥起稜明瑩者佳
劈砂末砂和尚頭砂俱不可用先以冷水洗

過揀去頑黯夾石者入乳鉢內研極細每砂一斤用河水二十盃入烏梅肉二兩煎湯以廣膠三錢投入同熬化勻候冷去滓濾清用飛朱砂漸加漸澄輕輕傾去黃水以湯盡爲度以紙覆碗面置日邊燂乾不可正晒日中乾後復研又如前另煎烏梅湯飛澄黃臙盡而止燂乾每研時盡一人之力約半日爲度造朱墨卽以前製過砂每一兩入龍腦二分廣膠和之不用餘物爲妙

新安程幼博以漆入油然煙爲墨自詫前無古人然宋人固嘗以松漬漆難以取煙矣避暑錄話云古未有用漆煙者三十年來人始爲之古法以瀝青與油等分用皆取其煙之細也

藥之有助于墨者桦皮解膠益色藤黃雞子清生漆牛角胎至堅猪膽鯉魚膽至黑而澤甘松藿香零陵香白檀丁香龍腦麝香辟膠煤

氣

歐陽通每書其墨必古松之煙末以麝香方下筆

地榆卷栢五倍

子丹參黃連紫草鬱金茜根黑豆百藥煎蘇
木胡桃青皮草烏頭牡丹皮棠梨葉阿梨勒
助色皂角除濕氣梔子仁青黛去膠色黃礞
研無聲川烏頭使膠力不勁酸石榴皮令研
中遲散巴豆增肥多則損光綠礬加黑色多
則敗膠朱砂益色此出古墨譜然煙之至精
者不假藥物之助假藥物之助者皆色不足
也

造印色曬油法 六月上伏日用蓖麻油或真

脂麻油每壹觔入新白芨片四兩

陳去黃黑者

飯

鍋上蒸軟又入胡椒壹兩略敲破分入大磁
盆內以絲綿覆碗面晒烈日中盡三伏爲度
油色白如水以滴紙上不暈開卽油成矣

製艾法將艾或烘或晒乾取去粗細二幹又
揉去粗皮不可太揉見綿將艾入砂礮以河
水煮數沸去黃水又換水煮如此十餘次將
艾取起擠水滴紙上晒乾以無痕爲度如有
痕再煮

配法每淨砂八兩入油三兩白蠟

黃蠟各貳錢半白礬貳錢

一方每兩三釐一方一兩

入油

內攪勻磁罐盛油紙皮紙封固日中晒數日
却以艾綿五錢拌入一法先將艾入印池內
次入油和透次入朱砂拌紅不紅加砂乾則
加油油透加艾

余見西域歐邏巴國人利瑪竇出示彼中書籍
其紙白色如繭薄而堅好兩面皆字不相映
奪贈余十餘番受墨不滲着水不濡甚異之
問何物所造利云以故布浸搗爲之乃知蔡

偷擣故魚網作紙卽此類爾又宋時川牋取
布機餘經不受緯者治作之故名布頭牋其
品冠天下六合人亦作終不佳蓋水力不同
故也

能書不擇筆此浪語也古來唯稱率更今不擇
筆然其字瘦勁多骨少肉故平生喜用狸毛
筆今人兔毫中亦必雜以狸云非是則不健
然稍多卽不佳而歐陽氏能使純者則又何
筆不可使耶然晉人遺意至歐陽氏漸失矣

不擇筆是其長處亦卽其短處正不足稱引也

小米謂筆不可意者如朽竹篙舟曲筴哺物誠然誠然今天下業筆者推吳興爲第一吳興又以黃文用爲第一文用死矣有兩孫皆往來金壇其長者以文用行最有名而最無行近乃作一色惡筆濡墨作字輒有小米之嘆而好事者猶以高價購之以手寫字以耳買筆可發一大笑其少者以朝輔行與其兄

初至時已駸駸欲度驊騮前矣已乃技日進而筆日益佳每至輒不同余不善書而喜佳筆遇可意者至輟衣食求之然慣使羊毫羊毫之價廉不爲筆工所利故趨余者少而獨小黃生特製遺余余非是不能染翰每來金壇必先謁余余字中無筆而渠手中有眼故喜而識之

漢晉人專工草書故古法帖中真行絕少觀趙壹所云鑽堅仰高忘其罷勞夕惕不息晷不

暇食十日一筆月數九墨領袖如皂唇齒常
黑雖處衆坐不遑談戲展指畫地見颺出血
猶不休輟則其臻于草聖亦不易矣張芝下
筆必爲楷則號匆匆不暇草書

世以淳化帖爲法書之祖然皆王著臨書非從
真蹟響榻雙鉤者何以知之余見宋時御府
所藏晉人真蹟及唐摹王右軍帖多矣凡閣
帖所載僅得其髣髴甚則併點畫形似盡失
之豈有摹脫真跡而舛鑿如是者至於賞鑒

不精真贗並收連綴蠹蝕不成文理又其小
小者也學書者欲據之而希蹤鍾王不亦遠
乎近世盛行長洲文氏停雲館帖皆作待詔
父子手脚而小楷尤爲失真之極不特晉法
盡亡卽褚虞歐顏筆意蕩然無遺矣吾友董
玄宰刻戲鴻堂帖亦一色自書卽雙鉤亦甚
草草石工又庸劣故不能大勝停雲玄宰書
家能品作此欲傳百世乃出新安吳用卿餘
清堂帖之下甚可惜也

晉人書妙在藏鋒非無鋒也但不露爾唐人則
露矣然鋒之爲鋒則無二也趙宋而後此意
寢微惟老米一人得之而炫露之極至於掀
舞故但長於行而不能真草爲世所譏至
本朝諸名家尚未知執使轉運而妄意藏鋒
然實無鋒可藏古書法幾漸滅殆盡矣刻石
手唐人爲最今世所傳宋榻本神采飛動恍
如真蹟如雲麾將軍碑九成宮銘聖教序之
類皆唐刻也其轉摺波磔處俱稜角分明故

鋒穎雖露而古人運筆意象隱然在日後世摹勒者亦妄意藏鋒而轉摺波磔處俱以圓渾爲工故成無骨之身無榦之樹停雲戲鴻之刻手固劣亦書家誤之也

吳郡韓敬堂先生家藏黃素黃庭經陶穀與米芾跋皆無之想入宣和御府重裝去之矣徽宗題云晉王羲之黃庭經米氏書史以爲是六朝人書無唐人氣格趙魏公以爲楊許書而董玄宰不知其何據蓋未攷之真誥也按

真誥翼真檢云真經出世之源始於晉哀帝
興寧二年太歲甲子紫虛元君上真司命南
嶽魏夫人下降授弟子瑯琊王司徒公府舍
人楊羲使作繇字寫出以傳護軍長史句容
許穆并第三息上計掾翽二許又更起寫修
行得道凡三君手書今見在世者經傳大小
十餘篇多掾寫真受四十餘卷多楊書又云
三君手迹楊君書最工不今不古能大能細
大較雖祖効却法筆力規矩並於二王而名

不顯者當以地微兼爲二王所抑故也據書
乃是學楊而字體勁利偏善寫經畫符與楊
相似鬱勃鋒勢殆非人工所逮長史章草乃
能而正書古拙符又不巧故不寫經也據此
則此絹本若非楊君始寫之本卽是許祿書
今真誥所列皆三君手書多荊州白牋梁時
去晉不遠已首尾零落魚爛缺失而此卷黃
素如新雖歷代尊奉少見風日非有神物護
持亦不至是晉人筆意一壞於王著二壞於

文氏父子而小楷尤甚不可不使世人見此
本韓長公昨見過以油紙撫本相示已付工
刻之矣

今學小楷者大抵宗黃庭經然世所行石本盡
作文衡山手脚無復晉人筆意屢見宋榻本
已然則傳訛襲謬其來久矣近時潁上得石
於井金陵甘氏得石於池皆古刻黃庭經潁
上本拙而近古甘氏本工而太今吾寧取潁
上爾淳熙秘閣續法帖第二卷有褚河南臨

本乃致佳與黃素黃庭頗相類初疑登善對
臨或其力不至此及檢黃長睿東觀餘論稱
其單郭未填筆勢精善乃知從真迹上撫出
非對臨也余以板本重繙毫髮不爽天下黃
庭帖當以吾此本爲第一具眼者必領吾此
語

宋翼每作一波嘗三過折筆每作一點如高峰
墜石每作一橫畫如千里陣雲每作一戈如
百鈞弩發每作一牽如萬歲枯藤每作一放

縱如足行之趣驟丁如鋼鉤入如崩浪此古人運筆取勢之法若胸中有萬卷書無一點塵依此法作字何患不到鍾王吾老矣無能爲矣後來之秀勉之哉

禮部韻略宋人業舉習詩賦者無不人置一編猶今之四書五經焉其注援引該博字句雋拔當時宿儒如楊誠齋輩往往時出之以見奇如配鹽幽菽之類是已而李文定南宮一賦不免落韻之失范蜀公彩霓二字亦誤爲

主司所黜以見字釋之不可不正其重如此
厥後毛晃父子以韻略爲未備故增之而聲
韻離合之間尚仍其舊至我朝高皇帝召
儒臣宋濂等諭之曰韻學起於江左殊失正
音有獨用當併爲通用者如東冬青青之屬
亦有一韻當析爲二韻者如虞模麻遮之屬
皆當改正後纂集成書大略釐正如天語
而註釋則一用毛晃增註賜名洪武正韻
頒行天下而韻略自此廢矣余求之三四十

年得宋本三皆經後人刪節非復全書若不
蒐而刻之百年後恐無復影響柰無同此志
者何

正韻之分合尚有可議者如通攝原當分爲二
韻東冬固當合矣公弓不可合也蓋牙音中
原有公空頤峴弓穹窮顙兩種公之入聲爲
穀弓之入聲爲刍豈可淆而爲一此不難知
而當時儒臣懾於天威不敢執奏遂致一
代同文之書不爲世所遵用今亦無奏請

重修者豈非缺典

古字母三十有六其聲遠而不相涉者見溪羣
端透定幫滂並明精清從心邪審影曉匣來
凡二十其聲近而常相誤切者亦十有六如
疑喻在魚韻則喻歸本母而缺疑基韻則疑
歸本母而缺喻不當以疑移分押次泥孃在
薑韻則孃歸本母而缺泥基韻則泥歸本母
而缺孃不當以泥尼分押次知照在基韻則
知歸本母而缺照高韻則照歸本母而缺知

不當以朝昭分押次穿徹在堅韻則各歸本
母其在東韻不當以充忡分押次澄牀在京
韻則澄歸本母而缺牀江韻則牀歸本母而
缺澄不當以牀淙分押次非敷在基韻則非
歸本母而缺敷模韻則敷歸本母而缺非不
當以跗敷分押次奉微在東韻則奉歸本母
而缺微基韻則微歸本母而缺奉其在孤韻
不當以扶無分押次禪日在堅韻則禪歸本
母而缺日巾韻則日歸本母而缺禪不當以

人辰分押蓋法非不精也傳之者失其真用之者不得其要耳金陵李士龍作字學正譌止存三十一母而知徹澄孃非五母以爲重贅悉去之其所離合悉金陵鄉音不可以行之四方況後世乎進士何六陽六安人其鄉音與金陵相近遂以爲不刊之書用其說改定切韻指南序而刻之余恐古法從此漸亡故稍爲駁正於此

字何用哉以記聲也有一聲卽當有一字今之

字多至於數萬而爲聲幾何故吾謂倉頡亦太拙矣然猶幸有假借一途可以旁通也而後之人輒復造字以益之且一字而有科斗焉有大篆焉有小篆焉有隸焉有八分焉有行焉有草焉有古焉有俗焉固已不勝其繁矣然猶益之而不止有好事者盡古今之字而集之可以充棟而其有聲無字者固自若也以故老師宿儒開卷多不識之字何論淺學如此則字宜不可勝用矣而婦人豎子以

俗名一事物求誌之冊則執筆不知所措豈
非字學之一大弊哉

顏師古嘗言西域僧能以十四字貫一切音文
省而義廣其字之母凡五十其中十六字爲
轉聲之範三十四爲五音之祖或一或二或
三至於正載互合而有輕重清濁非清非濁
等聲其詳見於天竺字源余未之見也昨一
西僧來自烏思藏精於字學其書卽今內
府番經廠中番書與西天梵書稍異亦如篆

之變而爲𣪠云爾其爲字母亦如前數若一
音而轉注他母或一音而轉注他韻者皆於
母字之上下左右別之大略如今之圈平上
去入之例故其國開卷無不識之字以反切
卽在本字之內不似此中字反切另注且有
不能反切者也鳥獸之音草木之聲莫不可
記而可譜况人言語乎吾恨倉頡不得此法
故以爲太拙

余丙戌秋七月至吳江得觀澄清堂帖十餘卷

皆二王書字畫流動筆意宛然乃同年王大
行孝物後余在翰林時有骨董持一卷視董
玄宰玄宰絕叫以爲奇特余告以吳江本玄
宰乃亟就王君求之王君遂珍祕不復肯出
無何王君物故聞近亦歸太倉王荆石先生
丁未秋過先生齋中出以見示則已亡失太
半矣玄宰鈎數十行附戲鴻堂帖末無復筆
意後跋以爲賀鑑手摹南唐李氏所刻按東
觀餘論云世傳十七帖別本蓋南唐後主李

煜得唐賀知章臨寫本勒石置澄心堂者而
本朝侍書王著又將勒石勢殊踈拙盖玄宰
誤以十七帖爲此帖又誤以澄心堂爲澄清
堂也李後主嘗詔徐鉉以所藏古今法帖入
之石名昇元帖是又在閣帖之先矣昨晤汪
仲嘉謂淳化帖卽翻刻昇元帖不知何據當
又是誤以十七爲昇元爾博洽之難如此

法帖勒石必假翻朱朱用膠則不甚分明不用
膠則易於磨涅以刀隨朱宛轉石屑蒙翳每

以意爲之豈能纖毫不爽乃知閣帖只用棗木米老每稱板本盖有爲也况今世絕少刻石高手而宣歙間剗剗之工刻寫意山水花木皆不失筆意若郭填者能從真蹟精意脫出今以棗木刻之豈復數閣帖哉

定武禊帖石刻有謂唐太宗以真蹟刻置學士院後朱梁徙於汴耶律德光載歸棄於鍾山土人李學究得之埋土中李沒其子出之宋景文公買置公帑者有謂游士攜此石走四

方後死於定武營妓家伶人孟永清取以獻者有謂太宗旣得辯才真蹟令趙模等摹本賜方鎮定武以玉石刻之者有謂卽江左所傳會稽石錢氏歸朝定武富民買之以歸者大抵首說具有原委近是然其爲石刻之鼻祖其爲蘭亭之肖子因於衆論紛紜不能詳其所自出而具見之矣

定武石爲薛紹彭鐫損湍流帶右天五字故世有五字損本不損本然此石一出土之時已

缺首行會字一角二行亭字三行羣字六行
列字七行盛字幽字九行盛字十行遊字十
四行殊字二十行古字二十一行不字皆有
刊損處今世所傳五字不損本乃有一字不
刊者皆贗物也

唐天寶末平原太守顏真卿撰韻海鏡源二百
卷未畢屬胡寇憑陵拔身濟河遺失五十餘
卷廣德中爲湖州刺史重加補緝更於正經
之外加入子史釋道諸書撰成三百六十卷

其書於陸法言切韻外增出一萬四千七百六十一字先起說文爲篆字次作今文隸字仍具別體爲證然後註以諸家字書解釋既畢徵九經兩字以上取句末字編入本韻爰及諸書皆倣此自有聲韻已來其撰述該備未有如顏公此書也大曆二年入爲刑部尚書詣銀臺門進上之奉敕宣付秘閣賜絹五百疋今唐書與晁氏讀書志馬氏經籍考中皆不載篇目則其書已不傳久矣宋人錢諷

唐韻分四聲而以十一史之句註於下名爲
回溪史韻凡四十九卷元人陰氏兄弟作韻
府詳玉趙子昂稱其上涉羣書下包諸子賢
於回溪史韻多矣 高皇帝萬幾之暇嘗好
觀之故解縉封事有曰韻府出元之陰氏鄙
猥細儒學孤識陋蠅集一時兔園寒士抄集
穢蕪畧無可采 陛下若喜其便於檢閱則
願集一二志士儒英臣請執筆而隨其後上
渚唐虞夏商周孔之華奧下及關閩濂洛之

佳葩根實精明隨旨類別以備勸戒刪其無益焚其繆妄勒成一書上接經史豈非太平制作之一端也歟至永樂中文皇帝乃命儒臣彙粹祕閣書籍分韻采入以備檢考供事編輯者三千餘人爲卷凡三萬有奇名曰永樂大典書成貯之文樓當是納解學士之請也嘉靖初年肅皇帝好古禮文之事時取探討殊寶愛之自後凡有疑卻悉按韻索覽凡案間每有一二帙在焉及三十六年三

殿災 上聞變卽命左右趣登文樓出大典
一甲夜中凡三四傳 旨是書遂得不燬四十
年復諭大學士徐階選儒士程道南等百餘
人就史館重錄一部貯之他所以備不虞而
命學士高拱左中允張居正同諭德瞿景淳
等校之以 國家全盛之力刊之於木布之
四方傳之萬世亦開闢以來未有之盛事也
然而未聞有議及者將使數千百年後好學
稽古之士復慨然抱鏡源之恨豈不惜哉

漢懲秦焚書之敗大收篇籍廣開獻書之路迄
孝武世建藏書之策置寫書之官由是外有
太常太史博士之署內有延閣廣內祕室之
府至成帝時頗有散亡乃使謁者陳農求遺
書於天下詔光祿大夫劉向校經傳諸子詩
賦步兵校尉任宏校兵書太史令尹咸校數
術侍醫李柱國校方技會向卒哀帝復使向
子歆嗣父之業歆遂總會群篇著爲七略凡
三萬三千九十卷王莽之末焚燒無遺此焚

書而後書之一厄也光武明章好文重經術
鴻生鉅儒負帙自遠至者不可勝筭石室蘭
臺彌以充積初遷洛陽所載經傳二千餘輒
爾後撰錄三倍於前董卓移都之際自辟雍
東觀宣明鴻都諸藏典冊文章竟共剖散圖
書縑帛軍人以爲帷囊及王允收而西者纔
七十餘乘道路艱遠復棄其半長安之亂一
時焚蕩此則書之二厄也魏氏采掇遺亡藏
在三閣祕書郎鄭默始制中經祕書監荀勗

更著新簿分經史子集爲四部甲乙丙丁之
目合二萬九千九百四十五卷惠懷之末京
華蕩覆石渠文集靡有孑遺此則書之三厄
也東晉之初漸更鳩聚著作郎李充以勗舊
簿校之其見存者但爲三千一十四卷其後
中朝遺書稍流江左宋文帝元嘉八年祕書
監謝靈運造四部目錄凡六萬四千五百八
十二卷元徽初祕書丞王儉又造目錄凡萬
五千七百四卷儉又別撰七志曰經典志諸

子志文翰志軍書志陰陽志術藝志圖譜志
齊永明中祕書丞王亮監謝朓又造書目凡
一萬八千一十卷齊末兵火延燒祕閣經籍
遺散梁初祕書監任昉受命於文德殿內列
藏衆書華林園中總集經典凡二萬三千一
百六卷而釋氏不預焉普通中處士阮孝緒
更爲七錄曰經典錄記傳錄子兵錄文集錄
技術錄佛錄道錄元帝克平侯景收文德殿
書及公私經籍歸于江陵凡十萬餘卷周師

入郢咸自焚之此則書之四厄也宋武入關
收其圖籍纔四千卷赤字赤紙文字古拙魏
孝文始都洛陽借書於齊祕府稍僅充實爾
朱之亂散落復多北齊遷業頗更搜聚後周
定鼎書止八千後稍增至萬卷武帝平齊先
封書府所加舊本纔至五千隋開皇三年祕
書監牛弘表請分遣使人探討異本每書一
卷賞絹一疋校寫既定本卽歸主於是民間
異書往往聞出及平陳後經籍漸多煬帝限

寫五十副本分爲三品於東都觀文殿前東西廊屋列以貯之唐之克隋鄭公盡收圖書命司農少卿宋遵貴載之以船泝河西上行經底柱多被湮沒十存一二而已貞觀中魏徵虞世南顏師古繼爲祕書監請購天下書選五品以上子孫工書者爲書手繕寫藏於內庫以官人掌之玄宗時又借民間異本傳錄置修書院於著作院又於大明宮光順門外東都永福門外皆創集賢書院太府月給

蜀郡麻紙五千番李給上谷墨三百三十六
丸歲給河間景城清河博平四郡兔千五百
皮爲筆材兩都各聚書四部以甲乙丙丁爲
次列經史子集四庫其本有正有副軸帶

籤皆異色以別之祿山之亂尺簡不藏此則
書之五厄也元載爲相奏以千錢購書一卷
又命拾遺苗發等使江淮括訪至文宗時又
詔搜採於是四庫之書復完分藏于十二庫
黃巢之亂存者蓋尠此則書之六厄也五季

之亂有國之君疆土既促日尋干戈而猶汲汲以搜訪遺書爲要務後唐莊宗募民獻書及三百卷授以試銜其選調之官每百卷減一選後漢令凡以三館亡書來上者計卷帙賜之金帛數多者授以官周世宗於凡獻書者悉加優賜以誘致之又選常叅官三十人校讎刊正是時諸國分據皆聚典籍而吳蜀爲多宋興之初三館有書萬二千餘卷平蜀又得書萬三千卷平江南得一萬餘卷始平

荆南終并兩浙皆盡收其圖書而朱載錢弼
彭幹等皆詣闕獻書合千二百二十八卷於
是群書漸備矣太宗時詔中外購募有以亡
書來土及三百卷當議甄錄酬獎餘第卷帙
之數等級優賜不願送官者借本寫畢還之
藏書之所爲崇文院自建隆至大中祥符著
錄總二萬六千二百八十卷八年館閣火移
寓右掖門外謂之崇文外院借太清樓本補
寫九年新作崇文院成時已增募寫書史專

事完糾先後上經史子書二萬七百餘卷認
購求逸書復以書有繆濫不完始命定其存
廢因倣開元四部錄爲崇文總目慶曆初成
書凡三萬六百六十九卷然或相重亦有可
取而棄不錄者大觀中祕書監何志同言漢
著七略凡爲書三萬三千九百卷隋所藏至
三十七萬卷唐開元間八萬九千六百卷慶
曆間常命儒臣集四庫爲籍名曰崇文總目
凡三萬六百六十九卷慶曆距今未遠也按

籍而求之十纔六七號爲全本者不過二萬
餘卷而脫簡斷編亡散缺逸之數浸多謂宜
及今有所搜採視舊錄有未備者頒其名數
於天下選文學博雅之士求訪總錄之外別
有異書並借傳寫或官給劄卽其家傳之就
加校正上之策府從之政和中校書郎孫覲
言頃因臣僚建白訪求遺書今累年所得總
目之外凡數百家幾萬餘卷乞詔祕書省官
討論誤次增入總目合爲一書從之名曰祕

書總目宣和中祕書省言有詔搜訪士民家
藏書籍悉上送官參校有無募工繕寫藏之
御府近與三館參校榮州助教張順所進二
百二十三卷李東一百六十二卷皆係闕遺
乞加褒賞詔順賜進士出身東補迪功郎七
年祕書省言取索到王闡張宿等家藏書以
三館祕閣書目比對所無者凡六百五十八
部二千四百一十七卷及集省官校勘悉善
本比前後所進書數頗多詔闡補承務郎宿

補迪功郎然自熙寧以來搜訪補緝至宣和
盛矣靖康之變散失莫考今見於著錄往往
多非曩時所訪求者凡一千四百四十三部
二萬五千二百五十四卷高宗渡江書籍散
佚獻書有賞或以官故家藏者或命就錄鬻
者悉市之淳熙中祕書少監陳騏等言中興
館閣藏書前後搜訪部帙漸廣乞倣崇文總
目類次後書目成計見在書四萬四千四百
八十六卷較崇文所載實多一萬三千八百

一十七卷後參三朝所志多八千二百九十
卷兩朝所志多三萬五千九百九十二卷嘉
定中以四庫之外書復充斥詔秘書丞張攀
等續書目又得一萬四千九百四十三卷而
太常太史博士之藏諸郡諸路刻板而未及
獻者不預焉蓋自紹興至嘉定承平百載遺
書十出八九著書立言之士又益衆往往多
充祕府紹定辛卯火災書又多闕自是而宋
且不祚矣元立經籍所後更爲弘文院又立

興文署以編集經史收掌板刻爲職宋元遺
書賴以不廢我太祖高皇帝克燕首命

大將軍收秘書監圖書典籍及太常法服祭
器儀象戶口版籍既又詔求遺書散民間

者永樂移都北平命學士陳循輦文淵

閣書以從購遺書之官四出所蓄甚富正統
六年大學士楊士奇等言文淵閣見貯書

籍有祖宗御製文集及古今經史子集之
書自永樂十九年南京取來一向於左順

門北廊收貯未有完整書目近奉 旨移貯
文淵閣東閣臣等逐一打點清切編置字號
寫完一本總名曰 文淵閣書目合請用
廣運之寶鈐識仍藏於 文淵閣永遠備照
庶無遺失 詔從之然自是而後閣臣既鮮
省覈典籍又多竊取而祕府書籍往往散逸
於民間矣嘉靖中御史徐九臯建言欲將歷
代藝文志書目參對今貯經籍凡有不備者
行令中外士民之家借本送官謄寫原本給

還量優賞賚其有志所不載及近世中外文
僚山林碩學記著撰述有裨治理者並令搜
採解送禮部發史館看詳校正藏諸中祕而
又乞 上於便殿省閱章奏處分政事之暇
時賜召見講讀侍從諸臣從容諏訪辨析經
旨 詔下禮部議尚書夏言覆奏仰惟 皇
上尊 祖敬 宗右文重道邇者恭建 皇
史成尊藏 累朝實訓實錄并 列聖御製
文集四書五經性理等書及修輯歷代全史

誠帝王希世之曠典萬世不刊之事業也今
本官具奏前因具見仰贊 聖謨廣敷文治
之意合候 命下移文翰林院查祕閣所貯
經籍有無缺遺不備之書備開書目行本部
通行兩京及天下撫按衙門轉行提學官負
用心搜訪凡藝文志所載歷代遺書及 本
朝名臣碩儒所著述文集凡有補于世教足
成一家之言者一體收採藏貯及奏請 召
見侍從諸臣亦是仰承 皇上緝熙聖學延

見講官以備 顧問之意尋得 旨書籍充
棟學者不用心亦徒示虛名耳苟能以經書
躬行實踐爲治有餘裕矣此心不養以正召
見亦虛應也都罷是時 上漸廢朝講矣而
請不時召見文學之臣爲忤 旨故并求遺
書亦報罷然不遣博雅專使而徒行提學官
負真虛應耳夫以我 明之盛崇儒右文超
軼前代而購書之詔希闊無聞東閣之藏蕩
析殆盡將使萬世之下有遺議焉恐不可以

爲迂闊不切事情之務而忽之也

載酒問奇字今人常用之然漢書第言劉棻從揚雄學作奇字而雄素貧嗜酒人希至其門時有好事者載酒肴從游學則載酒學奇字蓋二事爾今人又以字之新僻者爲奇字至以名齋名書皆繆也此所謂奇字乃大篆耳王莽居攝使大司空甄豐等校文書之部自以爲應制作頗改定古文時有六書一曰古文孔子壁中書也二曰奇字卽古文而異者

也三曰篆書卽小篆秦始皇帝使下杜人程邈所作也四曰佐書卽秦隸書五曰繆篆所以摹印也六曰鳥蟲書所以書幡信也蕭子良云籀書卽大篆新臣甄豐謂之奇字史籀增古文爲之故與古文異也今乃以隸書之異者而冒其名皆不讀書之過也

字書謂鄭重殷勤也而漢書王莽傳非皇天所以鄭重錫符命之意注云鄭重猶云頻煩也以鄭重錫符命之意注云鄭重猶云頻煩也頻煩正見殷勤之意然二釋不妨別用故顏

氏家訓云吾亦不能鄭重聊舉近世切要以
啓寤汝耳此正用頻煩義不然謂之吾亦不
能殷勤可乎沈存中筆談載石曼卿事云他
日試使人通鄭重則閉門不納亦無應門者
正取殷勤義不然謂之使人通頻煩可乎

北音之鶻突卽南音之糊塗而南人兩用之
黃大癡題張子政所畫山水云山水之作昉自
漢唐古筆遺墨不復多見米南宮評品獨稱
董北苑山水無半點李成范寬俗氣一片江

南景也厥後僧巨然陸道士皆宗其法陸筆
罕見然筆往往有之亦有逼於董者其有學
於然者曰江貫道用墨輕淡勻潔林木樹葉
排列珠琲宋人亦珍之視然則大有徑庭矣
作山水者必以董爲師法如吟詩之學杜也
大元聖世區域之大前古無儔高公遠追北
苑其用意高古用墨沉着天真自然特立雖
置之巨陸之右亦何忝焉松雪文敏公生於
宋末而學問之道凡經史子集古樂府音律

天文地理百家之蘊無不詰其深妙亦豈特
書畫而已以其翰墨入神拚其實學耳愚生
多幸獲侍杖屨於松雪齋中動經歲月目擊
揮灑耳聆議論至於丹書染翰之理莫不提
獎而訓誨之何可忘也惟其頑懶荒惰日以
滑稽從事深有負於公耳數十年不見張子
政其先世宣勞王室拓開饒漕於鯨波之間
爲一代偉事古昔河渠貨殖書傳之所未載
者而子孫乃能從事此道雖房山松雪九京

可作亦將喜而進之矣僕老垂死誠有愧而
畏焉者至正五年六月廿又七日後學黃望
時年七十又七觀此則子政乃張瑄之子孫
也子政名守中

蘇長公赤壁賦末云唯江上之清風與山間之
明月耳得之而成聲目遇之而成色取之無
禁用之不竭是造物者之無盡藏也而吾與
子之所共食余平生四見長公手書真蹟皆
作食而俗刻妄改爲適可恨也食字之義世

畢解者王弼洲公以張蒼傳食酒數石不亂
釋之亦非是按內典言一切有情皆依食住
其釋食字云能生喜樂增益身心故增一阿
含經云眼以眠爲食耳以聲爲食鼻以香爲
食舌以味爲食身以細膩爲食意以法爲食
涅槃以無放逸爲食然則耳遇之而成聲目
遇之而成色正是食義耳細味之乃知其用
字之妙也

王弼洲先生文章氣節風流皆當代大家其倦

卷之四
二
倦汲引後進有海岳不讓涓埃之意自當於
古人中求之然世人每比之蘇長公則余竊
不謂然無論其它卽讀其文章弁洲尚微有
紗帽山人氣長公雖鑾坡玉堂貴人自是從
十洲三島謫來者何可同日道也

文字中不得趣者便爲文字縛伸紙濡毫何異
桎梏得趣者哀憤侘傺皆於文字中銷之而
况志滿情流手舞足蹈者哉

品外錄錄孫武子行軍篇甚訝其不倫後綴歐

陽永叔醉翁亭記以爲記之也字章法出于
此也何意眉公棄儒冠二十年尚脫頭巾氣
不盡古人弄筆偶爾興到自然成文不容安
排豈關倣效王右軍筆陳圖帖謂凝神靜思
預想字形大小偃仰平直振動令筋脉相連
意在筆前然後作字吾以爲必非右軍之言
若未作字先有字形則是死字豈能造神妙
邪世傳右軍醉後以迭殘筆寫蘭亭叙旦起
更寫皆不如故盡廢之獨存初本雖未必實

然的有此理吁此可爲得趣者道也夫作字
不得趣書傭胥史也作文不得趣三家村學
究下初綴對學生也

詩卽樂府也古樂府音節至唐而變六故唐人
不爲古樂府而以近體爲樂府是真樂府也
後人析樂府與詩而二之非也然取可歌者
而爲樂府不可歌者而爲詩猶未爲大失也
初盛唐近體詩皆可歌者皆謂之詩後人擬
古樂府皆不可歌者而謂之樂府則非之非

者也近代二三名家句櫟字擬甚至全篇僅
易數字自以爲古樂府遂厭薄唐人而不知
唐人所不屑者也可愧也

李于鱗曰唐無五言古詩而有其古詩陳子昂
以其古詩爲古詩弗取也余不謂然漢魏高
古而變化易窮六朝綺麗而情事不匱若夫
窮工極態抉奧發扁極胸臆之所欲言道前
人之所未道則唐古詩又何讓焉余爲此論
久矣顧不善詩而談詩又違俗如此將爲人

所唾罵又誰信之今見于穀峰先生自敘其
五言古詩與余意合而後敢出之敘曰余爲
五言古風好學魏晉非其質也夫魏晉之於
五言豈非神化學之則迂矣何者意象空洞
樸而不敢瑣軌塗整嚴制而不敢騁少則難
變多則易窮古所謂鸚鵡語不過數聲耳原
本性靈極命物態洪纖明滅畢究精蘊唐果
無五言古哉余旣知其解矣而不能舍魏晉
者取其可以藏拙且適所便非能遂似之也

嗚呼先生業已爲魏晉而不爲唐矣然猶成
推唐如此若其不能爲者而自以學魏晉坐
藏拙此豈特識鑒之高而已哉

四月四日燈下獨坐偶閱袁中郎錦帆集其論
詩云物真則貴真則我面不能同君面而況
古人之面貌乎唐自有詩也不必選體也初
盛中晚自有詩也不必初盛也李杜王岑錢
劉下逮元白盧鄭各自有詩也不必李杜也
趙宋亦然陳歐蘇黃諸人有一字襲唐者乎

又有一字相襲者乎至其不能爲唐殆是氣
運使然猶唐之不能爲選選之不能爲漢魏
耳今之君子乃欲概天下而唐之又且以不
唐病宋夫旣以不唐病宋矣何不以不選病
唐不漢魏病選不三百篇病漢不結繩鳥跡
病三百篇耶讀未終篇不覺擊節曰快哉論
也此論出而世之稱詩者皆當頽面咋舌退
矣雖然猶未盡也夫詩樂章也歌之而比於
八音以成節奏者也三百篇之歌失而後有

漢魏漢魏之歌失而後有選選之歌失而後
有唐唐之歌失而後有小詞則宋之小詞宋
之真詩也小詞之歌失而後有曲則元之曲
元之真詩也若夫宋元之詩吾不謂之詩矣
非爲其不唐也爲其不可歌也不可歌矣又
烏取夫五七言而韻之也哉吾固無詩才然
其絕不爲詩未必爲無見也

餘姚管

志其

嘉靖初登進士第授刑部主事同

官言貴里陽明先生初仕提牢時獄吏白宰

豬訝而問之則以囚飯餘瀋飼之既肥而屠之售其肉以充本署公用先生歎曰囚應死之人而不絕其養此國家之仁乃竊其贏餘以自潤此豈人所爲乎立白之尚書散其肉於諸囚禁勿復畜管後奉差歸謁陽明因言先生勲業在宇宙無論已而初仕時如此舉措尚爲人所稱慕語未卒先生面發赤曰此吾少年不知好惡欺天罔人之事賢輩當以爲戒乃稱說之耶耿恭簡公嘗舉以爲言

曰此舉何以爲欺天罔人想其未當處在白
尚書一節近於形人之短耶余謂此在一念
隱微處自勘自知不在形迹間也陽明先生
嘗自言少年初入仕途幾墮落鄉愿坑筭旣
更患難乃爲狂狷晚年始庶幾中行耳提牢
之日正其爲鄉愿時乎余觀世之賢人君子
默默墮此境者不少矣學之貴講全在此處
不然吾不知其所講何學也

萬曆丙午冬日余過鷺峰寺訪汪仲嘉仲嘉留

午餐高原昱法師王太古吳翁晉皆在焉仲
嘉謂余曰公知王節齋所以死乎余曰不知
也仲嘉曰節齋爲四川參政時得心腹痛疾
醫療之百方不衰日以益甚聞峨眉有道士
善醫然不可致也節齋親至山屏輿從徒步
至其寓處以示虔道者望見卽驚曰病深矣
旣展拜相讓坐定問公於服餌有生用血氣
之物焙製未徹者乎曰有之常服補陰丸數
十年矣中用龜甲酒炙而入之曰是矣宜亟

歸屈其指曰猶可將及家也節齋遽接檄歸
至吳閭輒大下赤色小龜無數是夕卒于舟
中余諭於衆曰公等知其說乎夫貪戀軀殼
者萬物皆然而龜爲甚故最壽而難死昔有
支牀足三十年無恙者愚癡之效也道家顧
以爲善導引而欲効之不亦謬乎先王知之
故用之以卜謂其有識神在焉古人用之入
藥必取自死朽敗者防其得人生氣則復活
也活則以人之氣血脂膜爲糧竭卽及五載

六府而死矣本草稱龜甲所主大率破癥瘕
已瘧痔陰蝕漏下赤白不言補心腎自丹溪
有補陰之說而後世煎膠製丸服之無纖毫
之益且有害若是可不戒乎旣歸而識之冊
以告來者

藥市中唯麝臍易雜而多僞塵史言宜寘諸懷
中以氣溫之久而視之手指按之柔輒者真
也堅實者僞也歛人黃聖期爲余言嘗見有
鬻麝臍人華服浪游多費因規之曰君之所

業勢在不豐何過侈若是其人曰世之業藥
得子錢多無如其者問其母錢曰以銀二銖
易麝一銖問其賣之直曰亦以銀二銖售麝
一銖然則何謂子錢耶曰吾以它物雜之而
其香同其色又同雖老於藥市者不能辨也
然則子何以辨之其人恡不肯言固問之因
密語曰麝之內悉一氣凝結原無滓質第
口噙良久泯化無迹者真也有滓質不化者
僞也

亦有五德不上面仁也喜傳於人義也令人又
手揩擦禮也生骨節罅間智也痒必以時信
也猶亦有五德不捕鼠仁也足跡徧鄰家義
也同客飲饌禮也藏肴羞幽顯處必得之智
也寒輒煨竈信也

劉實庵先生爲吾邑令時余外舅于見素公入
縣過主簿門有隸坐門闕不爲起公怒使從
人批其頰主簿泣訴于先生先生笑解之曰
金壇人批金壇人於吾輩何預而爲之動心

乎夫隸賤役也而鄉士大夫之至於吾室者
實也吾役慢吾賓吾亦有咎焉不自引責而
以是尤何哉主簿慚謝而退

丙子劉襄毅公知金壇縣事始修縣志時
先大父中憲府君實受聘主之書成王文成
公爲之序謹嚴詳核時稱良史且六十年而
未有續之者庠生虞天與年七十餘以所更
歷私有譏述而文詞猥俚不足步武前躅且
冰炭交懷不能無曲筆人弗之善也會劉實

卷之三
四
先生知縣事欲增損前志虞以所撰進先生略就而增損之遂付之梓一邑盡譁先恭簡尤不喜晚年因重修郡志命堂續丙子之遺因循未果友人劉幼安聞之以爲取怨招謫貽書止余遂決意不爲今又八年所矣索居無事汎覽群籍遇有邑事輒手錄之兼之追憶舊聞感慨新事心閒手健時時弄筆窓下久而成帙名曰鄉曲記似無與於邑乘而將來續邑乘者固不可以不考也至於士風

濟濟民生利病尤三致意焉倘讀之而有竦
然動念者乎亦不無少補於一方雖怨謗何
恤哉萬曆甲辰秋七月念日念西居士識

東軒筆錄云夏英公竦以父歿王事得三班差
使然自少好讀書攻爲詩一日攜所業伺宰
相李文靖沆退朝拜於馬首而獻之文靖讀
其句有山勢蜂羣斷溪流燕尾分之句深愛
之終卷皆佳句翼日袖詩呈真宗及敘死事
之後乞與換文資遂改潤州金壇主簿今邑

粟主簿中無英公姓名

金壇俗故淳樸鄉民有白首不識官府者自隆慶庚午海忠介公開府江南頒條約有但知國法不知閤老尚書等語時邑有一二士夫稍不循禮邑令西蜀王侯儼欲摧抑之意稍露於是一邑闕然凡一錢交易無不形之訟牒不問歲月久近服屬親疎孫訟祖業弟陳兄財以卑凌尊以奴叛主比屋皆然南畝之夫盡釋耒鋤以告訐爲事城市鬪盜食肆至

不能給而邑之風俗始大壞矣忠介亦聞而惡之出榜嚴禁始爲衰止厥後所謂一二士夫者卒因郡守河南王公惟善來重懲向時告者盡復故所失蓋王侯欲損富以利貧意非不善而不知以害之之道利之也

憶庚午喧競時余伯父懿齋公爲訟者齧傷其鼻訴之王侯侯詰之訟者曰彼自齧之非關吾事左右無不失笑侯默然叱出蓋以不畏強禦爲名高而不自知庭侮於奸民其傷體

殆有甚焉

士大夫非甚不肖孰肯縱下人魚肉鄉里卽有
一二武斷者終與閭閻不親其患苦有數矣
惟鄉民之桀黠者爲閭閻患苦最甚平時與
士大夫關通錢財因而有隙遇有司不右此
輩時猶或歛手遜避若窺探上官有抑疆扶
弱之心輒以勢宦欺凌與訟動必得志因而
立慥於鄉曰鄉官如某某吾猶折其角何有
若鼠輩於是細民俛首懾伏惟其所吞噬而

莫敢誰何吾於吾邑見之屢矣安在其爲抑
彊扶弱哉蓋鄉農柔懦者目不識官府口不
能道辭寧受人欺奪至死不敢抗卽以事連
逮至公庭又往往以木訥受屈抑無辜而抵
罪何嘗受涓滴之潤於不畏強禦之有司耶
不虐無告堯舜猶難之今之有司長刁風而
庇奸民自以爲不虐無告而不知其所謂不
虐者正有告者也如保赤子心誠求之雖不
中不遠矣欲真不虐者正賴以至誠從事爾

誠之至也豚魚爲孚金石爲開而况靈人乎
卽有不肖士夫暴橫豪民且將革心向化又
何必僂及妻孥擾及雞豚爲伍伯增聲價也
哉

余報謁邑僚因談及船事邑僚曰本邑額派修
船十六上官每賤其估以屬佐貳首領船成
而船中所用之物畢具焉其費視所估或數
倍甚且十百輒取諸邑僚私財耳余不覺拊
膺曰上官如此而欲小官之廉豈可得哉小

官不廉而欲小民得其所豈可得哉且邑佐貳首領之賕必取諸詞訟則有錢者伸無錢者屈豈暇問曲直耶柰之何徒摧抑一二失意士夫以爲惠小民也

邑僚如縣丞石鏘主簿周仕典史馬鎮安皆以廉能爲邑人所稱頌石周皆以不謹罷而馬遷遠方巡檢貧不能赴官嗚呼上官激揚如此欲望政善民安豈可得哉

前令武林梁公嘗謂人云天下鄉官欺小民惟

金壇小民欺鄉官或問何故公曰金壇士大夫賢者斤斤自守而不肖者相媚嫉因親爲仇遠交而近攻無唇齒之顧而小民反有狐兔之悲寡不敵衆故也

金壇士大夫遇有義舉不肯併力一心往往甲可而乙否此倡而彼不和雖有一二慷慨仗義者亦往往以寡援無助而中罷其來似已久矣故謂金壇人爲烏龜頭言其觸事卽縮也邑之詈人極穢者曰烏龜故惡之而爲之

解曰張文簡公五冠賢關之試故名之曰五
魁頭嗚呼居其實欲辭其名得乎

金壇子鵞自宋已著載于郡乘然皆有力之家
欲饗大賓則偶一爲之其飼也有法其肥也
有時過期則復瘠矣至於供應上官則往往
用常鵞蓋難乎猝致故也癸巳以後有御史
行縣縣求肥鵞爲饌以鄉紳之饗已者爲準
行戶迫於鞭朴而求援於余余辭焉御史訪
余亟稱金壇富庶予力言其不然而御史弗

信也已而丹徒因糧重欲加派丹陽金壇言
于御史御史曰丹陽吾不知若金壇之富庶
誠宜加也嗚呼鵝之爲祟如此

周君食自京師歸述舊令尹許少薇公之言以
爲金壇士夫遠交而近攻自相殘賊不避骨
肉爲風俗之最惡者河南鄉情至厚而固始
頗有金壇之風然亦出于鵝豈鵝能爲祟耶
然余家自祖父以來不知飼鵝饗賓類用常
鵝耳至余奉不殺之戒市無可買則有時不

設鵝雖客疑其慢已而不之恤而竟不免乎
同類之攻安在其爲鵝祟也

金壇新令尹至鄉士夫郊迎起於萬曆間然亦
以義起不爲過也令尹上計還士庶遠迎有
過江者則起於十年間近則幾至傾邑出矣
後此士夫亦必隨風而靡恐父母公以爲驕
蹇不得不爾故也昔楊晝以釣道語宓子賤
曰投綸錯餌迎而吸之者陽橋也其爲魚也
薄而不美若存若亡若食不食者魴也其爲

魚也腴而多味宓子賤曰善於是未至單父
冠蓋迎之者交接於道子賤曰驅之驅之夫
楊晝之所謂陽橋者至矣今之士大夫妄意
令非子賤而以陽橋自處是慢令之尤者也
鄉士大夫閉戶讀書不事干謁宜爲郡邑長吏
所重而多以落落見疎忽有非望之訟在公
庭則藉手摧抑之如此者多矣然其爲人可
知也吾邑張虛菴先生棄雲南守歸山日唯
讀書賦詩課花鳥不入城市會有仲子之訟

守意叵測先生不得已拉先恭簡與偕至郡
庭迄於屈膝而後爲之少降顏色焉至今仲
子尚不得牽復而先生亦未與於里社之祀
嗚呼是時爲守者賢守也而猶若此得不爲
世道人心長太息哉

巡按御史何公行縣畢訪余問曰貴邑之南有
雄鎮爲通杭湖徑道者乎余曰有之其地名
湖溪然非雄鎮也明公之問其有爲乎何公
曰有投牒稅監言商舶多避澣墅稅而由此

者欲增設抽稅官爾余曰縣之自北而南淺狹不通巨舟故商舶不得至焉惟湖人之糴穀者往來於此巡檢司時取錙銖以自潤然恒饑欲死設有商舶而何以至是已而別去後杳不聞行勘蓋何公納芻蕘之言而寢之也至今邑人不知德焉嗚呼賢哉

金壇地僻非商賈所集旣無末可逐而小民又安故常拙于謀生第賴南畝所入耳富家亦唯租入是籍故田多者爲上戶然至萬畝者

少矣往往屑麤麥爲稀漿以充腹而高大其屋廬以侈觀故吳人嘲之曰啜薄粥起大屋然因屋之大也遂浪得富庶之名而吏部第天下郡縣繁簡亦註曰地僻民饒地則誠僻矣民果饒乎哉

金匱額設民壯二百名專爲捕盜守城之用而今皆不然率市猾惰農充之以勾攝公事爲業馮恃城社妄作寒暑爲閭閻之害不可勝言近年城中典肆兩遭劫掠白龍蕩之剽奪

殆無虛夕數壯夫之力可以縛之而無敢誰
何者不知歲糜數千金養此輩何用與其竭
民脂膏有害而無利曷若一切罷去以少紓
吾民也

勾攝公事萬萬不可用公人蓋其所至之地雞
犬不寧無論已而需求稍不遂意輒以拒捕
爲名爲膚受之愬以激上官之怒其昏懦者
至于惟其言是聽則是曲直之斷全在此輩
掌握而欲刑清訟簡事得其理民得其所豈

可得哉

盜與捕盜者州里惡人之可備憲訪與窩訪者皆密交也水火貓鼠合爲一家而欲盜息奸戢得乎

蘇松常鎮兵備道所轄地廣而事繁每直指使者行縣則郊迎陪謁廟慮囚閱操縣縣皆然故爲此官者每疲於奔走余在翰林時言於政府謂不若以糧儲水利歸併兵備而分而兩之政府以爲然會言官有建白者遂有

常鎮道之設

先恭簡以鴻臚卿家居時每張蓋入縣縣令頗不憚姜鳳阿先生亦以爲入縣不宜張蓋也余質之先公先公曰鄉士夫謁父母官不張蓋禮也父母官報謁而因去蓋以報之亦禮也此鳳阿之所執也今吾邑不然鄉士夫去蓋以謁令令則張蓋以報謁是明以令驕士大夫而士大夫去蓋自如則爲諂而已矣吾惡夫士君子而以諂事令也故寧張之

金壇自建縣以來無以善書名世者書史會要
稱戴幼公善書筆畫疎瘦婉麗勁疾不在唐
諸子下然不能以書名世者蓋以才學著又
世少見其書宜其不爲人知也

元有王翼字元徵號華陽生金壇人有所篆四
書行於世見書史會要

萬曆甲辰九月七日未申間地震有聲如兩舟
相觸者十一月九日復然月杪丑寅間復然